

Alphabet chi Majawjaw

A a	aho	G g	lulug
A a	ajiw	H h	hukhud
E e	empah	P p	pajong
I i	inlum	R r	palagwer
O o	olong	T t	taytay
U u	ugwah	W w	pantaw
B b	borpen	Pf pf	pfalat
D d	alad	Ng ng	ngamoy
J j	jojo'	Gw gw	gwangwang
K k	kolong	Ch ch	chagkhar
L l	littalit	Kh kh	khancheng
M m	mata	-	tu-ag
N n	nabto'	'	te'mar
Y y	lamuy		

a,a,b,ch,d,e,g,gw,h,i,j,k,kh,l,m,n,ng,o,p,pf,r,t,u,w,y,',-

Hini Aho

Hini aho ja apat chi hu-i na ja chugwa chi inga na ja chugwa khu chi mata na. Hini aho ja nachutchutan. Ot-ottong hinuy aho mu hini puha, muti it-ittang khu mu hini pfapfuy. Nablay ayya hini aho ja itatadlay na hini himot na. Aluulana an amin chi takhu hi maloh. Pfantajana hini nunhitugwan nun madhom. Achi chi-a alichuwan ay ni aho anong un mapfajag an agkhuy chi-a tintinnig. Maporhat hi pulutan hinuy aho. Muti ad ugwani ayya ja achi ta umihcha hi aho, ti cho-or hana na-akhar an aho.

Hini Ajiw

Cho-or chi kalahin chi ajiw. Gway ajiw hi o-otong ja umanchu-oy Gwacha khu hana ajiw an i'-i'-itang ja un cha hoho'chod. Gwacha hana ajiw an pfumunga hi ma'ma'-an. Ja gwacha hana ajiw an ma-id pfunga na. Hitay hini khun cha ay ajigwon ta gway itongo ja hija khu hini ephod cha hi pfalay. Otong hini itolong tay ajiw ti tomolong hini lamut na an mangchon ay tay lota ta achi megchay hachi pfuludna. Halimunan ta-o hato ajiw, hotti achi ta-o li-ajon hana i'-i'-itang ta omotong cha. Ja muntanum ta-o khu hana ajiw an pfumunga ta chom-or chi ma'ma'-an. Ja muntanum ta-o khu hana ajiw an omotong ta gway ephod hi pfalay ja gway itongo.

Hini Empah

Hichuy an empah ja em-empah chi manu'. Mapmaphod hini kolor tay an empah an muntitipfa (yellow). Numpfino-ob-on chi empah. Gwa hana em-empah chi kolong, ja em-empah chi manu', ja em-empah chi khanhu, ja em-empah chi turkey. Hato an em-empah ja podpodhon hana pfaniyah, ja puha, ja khajang, ja hana aho an chupopon ta anun cha. Ti ma-id olog cha an lomajaw. Hotti khun pu-ungon hato e'-e'-empah ta ma-id mangan ta gway omotong ta chom-or chi manu' ja kolong ja khanhu ja turkey ta gway ingina ta gway pihu, ja partiyon hot gway maphod hi ihcha.

Hini Inlum

Gway chah inlum ju? Hichuy inlum ja napolettakan hi mangmangitit. Matmatabpfa hichuy an inlum ti mapfi-ah an mun-inum ay ina na. Chugwa hichuy inga na ja apat chi hu-i na. Numpfino-ob-on hini kolor chi inlum. Gwacha hana mangmangitit (black), gwacha khu hana chengla (brown) ja hana mumpuchaw (white). Hehemmon an panganun hini inlum ja khun khu amhon ta achi mapuli-og. Me'pangan ta-o hi inlum ta gay omotong ja gway partiyon hi ihcha wenno ingina ja gway pangalan hi pihu. Podhon ju chah an me'pangan hi pfapfuy?

Hini Olong

Hini olong ja chugwa hini longat na ja hitay hini khun pfumutajan ja humikhupan ni angin an khun ta-o ehochohcha. Achi mumpapadchong chi olong, ti gwacha hana olong an pfimmajong an amat hana olong chi Malicano, ja gwacha khu hana olong an nachu'mit an amat hana olong ta-o an Pilipino. Numpadchong an maphod hini olong an pfimmajong ja hini olong an nachu'mit, ti hi Apo Jos chi nangephod ta gway usaron ta-o an munhochohcha. Halimunan ta-o hitay olong ta maleneh ja achi mahublan ti achi ta makay homochohcha ja matoy ta ken.

Hini Ugwah

Hini ugwah ja matachom. Cho-or chi pi-usaran chi ugwah. Usaron cha an munkhodkhod hi karni ja un cha ehakha'-ang hi ihcha, ja usaron cha khu an puntakhip hana hamcha' an ehakha'-ang hi ihcha. Mahapor hini ugwah hichi kuhhina, hotti hana ung-ungungnga ja achi ju khun alaon hana ugwah. Achi aju khu mon-o-odchon hi ugwah ti matachom ja omkhod. Podhom chah an makhod? Hotti achi ta mun-o-odchon hi ugwah ja achi ay-ayamon chi ugwah.

Hini Borpen

Hichuy an borpen ja mangitit hini panula' na. Numpfino-ob-on chi panula' chi borpen, Gway khortang (blue) ja gway mangitit, ja gway innunig (green), ja gway mumpfolah (red). Ngay podhom hi kolor chi borpen mu? Mahapor chi borpen nu i ta mun-ehkor ja mahapor khu hana memehtolo ja hana mangopihhina. Hana ayya mun-ekor hi day care ja hana kinder ja hana grade one ja achi cha pay mun-usar chi borpen ta hay lapeh chi usaron cha. Khenong ta umuy cha hi grade 2 ja un cha mahpay mun-usar hi borpen. Anagkha tugwali? Aa, ti hini ayya ung-ungnga ja khun mehalla hini atona an muntula', hotti nu usarona hini borpen ja nalikhat hi upfahon.

Hini Alad

Hichuy an alad ja ajiw. Hini alad ja mahahapor nu me'pangan ta hi pfapfuy. Alachon hini pfapfuy ta achi pfumaher. Ti lomajaw hini pfapfuy ja ma-id mapto' hi ay paningitan. Chin idi ja ajiw chi khun cha e-alad hi pfapfuy. Muti ad ugwani ja gwacha hana mang-alad hi khumo', ja gwacha khu hana mang-alad hi haminto. Muti gwacha pay hana khun mangusar hi ajiw. Mapmaphod hini khumo' ja haminto hi e-alad muti nangina hay hatu.

Hini Jojo'

Hitay jojo' ja pfalay chi keke, ti kili-om ayya hitay jojo' hot komeke hini takhu. Hitay jojo' ja marmalengot hotti a-arkh-arkhaw ja khun ta mun-amoh ta achi umakhub chi jojo'. Ti hini ayya achi chun mun-amoh hi a-arkha-arkhaw ja ma-anghuwan cha. Napukhit chi ma-anghuwan ti un ta me'challachallan ja khun ipinggwin chi hay tatakhu hi mehnot ay he-a. Gwacha hana na-anghuwan ja khun cha e-apja hay mumpfango an Rexona muti achi aanun tay Rexona hini angho. Hotti hay maphod hi aton ja un ta mun-amoh hi a-arkha-arkhaw ta maleneh chi achor hot achi umakhub chi jojo!

Hini Kolong

Hini kolong ja podpodhona an ay munhalluhallug hi chanum. Maphod chi me'pangan hi kolong, ti o-otong hini iklug na ja maphod hi ihcha. Hini khu iklog chi kolong hini ephod cha hi balut ja na-imas hi an-annun. Hini balut ja mangchat hi pfi-ah chi achor, hijaot un allon ni choktor an hini ayya kimmappoy chi achor na ja maphod nu mangan hi balut. Hot penhod ju chah chi balut?

Hini Littalit

Hini littalit ja chugwa hini oma'-atana. Oma'-at hi pfu-at hini angah na ja chutchut na. Muti oma'-at khu hi hagwiti ti napaja-an. Atattata-ot hitay littalit ti mep-ot ayya ay he-a ja monchokhoh hini kha'-omot na, ti achuchu-oy. Ja khun khu omalat ja mun-atachom hini pfapfa na. Achim ay ugnan hini littalit, ti omalat ja monchokhoh.

Hini Mata

Hichuy an mata ja un oh-ohha muti an amin chi anila' an animal ja chugwa chi mata cha. Hitay an mata ja matan chi takhu. Hini matan chi takhu ja chugwa ja gwacha hini ichoy na. Gwacha khu hini ochom. Hay hato ja amat cha hi hinchalo an mumpfantay ay tay mata ta ma-id umuy hi pfuta wenna hay lukhit. Hay khu oha hi pi-usaran chi ichoy ja ochom ja ar-artin chi mata ta maphod hi tigtikhan. Achi ju lomanon hini ichoy ju an amat hana khun aton chi pehkaw, ti amat makay hi pfanig hini angah. Podhom an amat hi pfanig? Hot achi ju ih-ihan hini ichoy ju.

Hini Nabto'

Hichuy an pakhuy ja nabto'. Hini ayya pakhuy ta-o ja khun cha kha-utan ta mumpfalin hi nabto' ta nalaka hi ehapoy. Ti achi megwa-at. Hini ayya amphilog chi pajaw na ja cho-or hini nabto' an pakhuy cha. Hini ayya ma-id pajaw na ja ma-id ken atag pe-ebto' cha hi pakhuy cha. Hot hay aton ni ammod an ma-id atag pajaw na ja un ay me'pfo'la hi pela' ta un ngumina hi pfokhah ta gway pe'-an cha.

Hini Lamuy

Hichin ayya ammod ta-o chin pengpenghana ja hay lamuy cha ja hana na-apfor an pfinnalit. Ad ugwani ayya ja cho-or chi kalahin chi lamuy. Gwacha hana lamuy an munterjapfu hi un ilamuy, ja gwacha hana pencher cut an mehehe'jot hi alipadpad ja achi pun-echa'-ang an chumalan, ti homalepfod chi hu-i. Hot un ken itiwitiwwid an chumalan. Podhom an muntiwitiwwid an chumalan? Hitay hini khun aton hana uchumna an pfabpfalahang an chumalan.

Hini Lulug

Hini lulug ja hija hini nunhu'-upan tay hu-i ja hini orpo. Nu ma-id lulug hot ma-id aton an chumalan ti ken un ma-a-anchong hitay achor. Ma-id aton an umpfun ja ma-id aton an muntamu ja ma-id aton an mun-ay-ayam. Maphod hitay lulug an enephod Apo Jos ta nalaka an ikuti hitay hu-i.

Hini Hukhud

Hini hukhud ja numpfino-ob-on. Gwacha hana hukhud an khumo' ja hana hukhud an palahtik. Gwacha khu hana gway pa-aw na ja gwacha khu hana ma-id chi pa-aw na. Gwacha khu hana hukhud chi oto. Hitay hini ihukhud hana na-utuwan ta mahukhud hini oto ta ma-id khun omalat. Ti omalat ayya hini oto ja mumpfalin hi pfongor, ja napukhit chi mapfongolan, ti munchokhoh ja angangaja, ti munchochojay hi tititigkhan. A-arkha-arkhaw ja munhukhud ta-o ta mapanuh chi pfuu' ta maphod hi titigkhan. Hini ayya achi munhukhud ja un amat ay Intollo.

Hini Pajong

Hitay pajong ja usaron nu umuchan wenno mapfi-ah hini hukhit. Chin pengpenghana anu heto ad Majawjaw ja ma-id pajong, hotti immuchan ayya ja hay tufun chi pflat chi i cha alan ta hijay idchong cha. Maphod ad ugwani, ti cho-or hana pajong an khun usaron nu umuchan. Khun khu usaron hana ay mun-ehkor ta achi mahnong hay libju cha. Hot gway chah pajong ju? Nu ma-id ayya pajong ju, ja allon ju ay ni ammod ju ta ngumina hay pajong ju.

Hini Palagwer

Hichuy an palagwer ja mapmaphod hitay kolor na. Hay ngachan tay an palagwer ja gomamela. Podpodhon chi pfabpfajong an ay mumpatto' hi palagwer ta i na inumon hini munlameeh an chanum chi palagwer. Hitay palagwer ja maphod hi itanum hichi nunhitugan ta gway buybuyaon. Khun cha khu alaon hini palager ta i-ar-arti cha hichi pommehaan, ja hichi pon-ehkolan. Cho-or hana maphod an palagwer, hotti piliyom hay penhod mu hi palagwer ta hijay pi'tanum mu hichi pflat ju.

Hini Taytay

Hini taytay ja hijay agwun an umuy hichi unig chi pfalay an natib. Hay khun cha ephod hi taytay ja hini ajiw wenna hay agwajan. Nu agwun hitay taytay ja khun or-olayon, ti malangad ja nakhah ta. Nu kampo hini pfalay ja achi mahapor hini taytay.

Hini Pantaw

Hini pantaw ja hijay humikhupan un ta umuy hichi unig chi hay pfalay wenna hay kuarto. Hana uchumna an pantaw ja gway pontorpfo-an. Nu gway omajan ja torpfo-on hini pfalay wenna kuarto ta ma-id agwun chi hay omakaw. Khun ipfukhot hini pantaw chi nunhitugwan nu gway omajan ja nun madhom.

Hini Pfolat

Hini pfolat ja maphod hi anun. Nu khun ma-eter hini ta'e ja omman ta hi nalum an pfolat hot achi ma-eter chi ta'e. Nalaka hitay pfolat hi itanum ti achi mun-enattajon. Hotti muntanum ta-o hi pfolat ta gway pfumunga hi anun ja cho-or ayya hay pfolat ja ingina ta-o ta gway pangalan hi pihu. Podhon ju chah an gway pihu ju? Muntanum aju hi pfolat.

Hini Ngamoy

Hichuy an ngamoy ja ngamoy chi pfallahang, ti chiya an napintulan. Maleneh hitay an ngamoy. Enephod Apo Jos hitay ngamoy ta gway muntamu. Enephod Apo Jos hitay ngamoy ta atonay maphod. Achi usaron hitay ngamoy an ometeng ja tomapa', ti napukhit. Nu mangan ta ayya ja khun pfulugwan ta achi ta ma'langan. Ikhad a pay, ti atattata-ot chi olang an umuy heto poto, hotti khun ta mun-ihu hon un ta mangan ta ma-id lukhit hi umuy heto poto, ja achi a ma'langan.

Hini Gwangwang

Hichuy an gwangwang ja gwacha han talaytay na, an agwun an pfumad-ang. Nu cho-or chi chanum hichi gwangwang, ja achi ta ay mun-am-ammoh ti mi-anud ta. Hichi gwangwang ja cho-or hana khachiw ja hana uchumna an munhalluhallug. Achi ta-o ay muntapar hi khinalot hichi gwangwang ta achi malukhit hini chanum.

Hini Chagkhar

Hini chagkhar ja usaron hana pfimmakit ja lemmakay an kimapuy chi pannig na. Tomolong hitay chagkhar ta mallag hini pannig hana kimapoy chi mata na. Gwacha khu hana ung-ungungnga an gway chokhoh chi mata cha, hot mapfalin an allon ni choctor chi mata hini kalahin chi chagkhar an usarona ta matulungan ta achi chomkhoh hini mata.

Hini Khancheng

Hini khancheng ja hijay oma'-at hi pfakah hay hana ma-id mapfalina an takhu. Hitay hini khun cha allon ay ni laju. Anagkha tugwali? Aa, ti anong un ma-id pahto ja mapfalin an me'pangan ta hi khancheng, ti nalaka ja un hay holo' chi anuna. Khagkhaju an chom-or, ti khun mumpiggwa an ma'lum hi oha hi tagwon ja khun oha wenna chugwa hini empfalay na. Nu cho-or chi khancheng ja gway pangalan hi ihcha ja khatah.

Hini Tu-ag

Hini ayya tu-ag ja hichi acha chi oma-ay-yan cha, ja hay numpfino-ob-on an pfunga chi anun cha. Gwacha han ohan lala-e an hi Charles Darwin ja allonnay un narpu hi takhu tu-ag. Nehalla hitay an khuna ituchu, ti hini ummannung ja hi Apo Jos chi nangephod ay chita-o an tatakhu. Mamati a chah an narpu a hi tu-ag?

Hini Te'mar

Hini te'mar ja hija hini khun usaron ta gway aton an mun-apoy ta ehakha'-ang chi anun. Nu ma-id te'mar, ngay aton ta-o mah an munhakha'-ang? Hitay te'mar ja achi ay-ayamon chi ung-ungungnga. Ti khemhon ja i cha nunpoor ja mapoolan hachi ajiw hichi pfuludna ja mapoolan khu chi pfalay. Hotti khun ta-o eha'pfa hini te'mar ta achi alan chi ung-ungungnga.